

卷十一

祠祀 秩祀

卷十二

祠祀 私祀

臨海縣志稿 第八冊

臨海縣志稿卷之十一

祠祀

秩祀

社稷壇 在郡城西一里

赤城新志

宋時在州西南六十步政和中郡

守李春卿建歲久傾圯近舍肆侵淳熙六年郡守沈揆命邑令

彭仲剛撤而新之

赤城志

四明樓鑰記台州之北大山綿互其一支自東而西蜿蜒逶迤至江而止勢若

回顧是爲龍顧之山子城據其下官宇在焉城西南隅去儀門百許步爲社稷之壇厥位面陽爽塏平曠昔人相攸而爲此必不苟也有司不戒日就荒圯頽垣成蹊莫牧無禁居民或侵漁其中淳熙己亥正月宗正丞沈侯被選來牧仲春行事愀然顧其僚曰是可以奉吾神乎乃命撤而新之臨海令彭仲剛建縣治於煨燼之餘俟知其才舉以任焉首案圖籍斥地之舊繚以周廬數十百丈始治地得什碑土中洗而讀之蓋政和中所頒社稷壇式也制度明甚橫列三壇門各四出中立社稷二壇風師居東雷師雨師居

西亦各爲壇壇高二尺有半又爲燎壇於風師之東南壇外稍高
於諸壇於是悉倣名數因其舊而增築之故有屋四楹爲視饌待
事之所既葺新之又增其一爲齋潔之地其涂北出表以二柱中
建臺門嚴關鍵以守之作於六月朔旦六旬有七日告成糜金錢
五十萬有奇民不知役工不告勤過者肅然始知有地土之敬侯
命鑰書之聞古先成民而後致力於神侯之下車訪民隱飭吏事
懷懷乎循良之風而思不倦以終之以是邦被山帶江水旱仍歲
又間鬱攸之災謂職諸幽者非人力所及故於神無所不致其敬
社稷之重其可後乎秋社展禮氣象一新環珮琮琤豆籩靜嘉神
貺昭格如在左右繼自今氣淑民和雨暘時若其必有相之者然
則侯之政真知所先後而致力於神者乃所以
成民也侯名揆字虞卿秀之嘉興人也攻媿集

嘉定三年火郡守黃當重修明洪武八年改建二壇一以石爲

主句龍配之一以木爲主后稷配之後合爲一壇罷去配享

康熙

府志

清雍正五年部頒定式每案用羊一豕一帛一鉶一簋四棗

栗鹽蕘魚豆四菲菹菁菹醯醢鹿脯簋二黍稷簋二稻粱歲以

春秋仲月上戊日致祭

大清會典

案浙江通志今制凡縣附郭者不別置縣壇今故載府壇而不及縣壇洪志載縣壇在縣西南一百步與赤城志同蓋宋時縣壇舊址也而以府壇故事序於下則舛錯矣今互參各志正之

風雲雷雨山川壇

在東門外二里明洪武二年建宋元合社稷

爲一壇明析爲二

洪志

清雍正二年部頒神位定式風雲雷雨稱

風雲雷雨之神居中帛四山川稱某縣境內山川之神居左帛

二城隍稱某縣城隍之神居右帛一帛並白色歲以春秋仲月

上戊日致祭陳設行禮與社稷壇同

大清會典

先農壇

在縣東崇和門外崇福堂清雍正六年詔郡縣建立先

農壇邑令陳高鑑奉文創建置耜田四畝九分

浙江通志

定制壇高

二尺一寸廣二丈五尺每歲仲春亥日正官率屬耆民恭祭先

農之神禮儀祭品照社稷壇例

大清會典

邑厲壇

在城東北明洪武初建

洪志

清定制壇廣一丈五尺高三

尺前陞三級餘無階繚以垣每歲清明日七月十五日十月初

一日三致祭正官率屬同祭迎城隍神主於壇上列無名孤魂

位於壇下兩旁祭品羊豕各三爵三果四羹飯冥衣

大清會典

府城隍廟

在大固山東北唐武德四年建宋嘉定十五年郡守

齊碩又新之遷正殿增禰殿寢殿

赤城志

元明無攷清順治間郡

守郭曰燧高培相繼修葺康熙五十八年郡守張聯元捐俸重

修次年以左右神祠梁柱朽壞復更作之仍翼以六邑城隍

康熙

府志 嘉慶八年郡守特通阿重建光緒三十三年知府張西園郡

紳何奏簣重修之又於廟左剏覽湖閣分上下兩層依山結構

頗稱勝境春秋佳日展展咸觴詠於此光緒志稿歲以春秋仲月上

戊日合祭於山川壇縣廟同大典

縣城隍廟 在縣東一百步宋端拱元年邑令王子興重建洪志

令自記云夫五等之祭祀有三代之簡書或相越以爲淫苟不舉而授創潔誠微福用庇元元即邑城隍率其常也子與雍熙初載隸斯邑仲春二月祭斯廟因誥有司曰邑居郡城廟從何得唯稱靈應勉而行之俄命祝以致詞遂投杯而占兆數四不叶左右聳然余曉之曰兆或吉焉神斯濫矣始疑廟非廟肯謂神乃神噫冥昧之理今古難之我先師夫子秘而不言矧後人哉由是春秋祀事躬親焉朔望告奠吏攝焉越明年自春徂夏礫石流金離離早苗焦灼殆盡雖羣望奔走曾無膚寸之陰霽霖之潤凡在口位若無所容遂率同僚禱而盟曰廟既隳人之恥也歲苟罪神之羞也幸雨如繩注則廟必鼎新未數日而有徵不崇朝而告足萬井之

歡聲雷動四郊之美稼雲興遽命良工廣其舊址揮斤運斧日就
月將基構克成輪奐具美因敢錄幽贊之驗序必葺之源未頃新
令尹清河張公濬至止公在泗上司刑彈紕歷兩任殆十周星紀
朝野具聞廉幹正直故遷是邑與余授代舉良能也予明日遂行
因託張公願樹其祠聊用直書實諸屋壁
庶幾乎後為繼者請禱無惑焉赤城集
元明無攷
康熙清咸

豐十一年燬於寇同治十一年邑令陳恩受重建

光緒志稿

案府縣城隍神舊志俱載有姓名惟謝志闕之其攷異有云天地
間有一物必有一物之神聚一方之名物而為高城深池以衛之
所以主之者夫豈無其神哉但歷代類封公侯之爵則失之矣洪
武三年詔悉革去止稱某府某縣城隍之神毀其塑像造為木主
仍令革去廟中間雜神道其廟宇一如公廨設公座筆硯如守令
俾之監察司民一洗千百世陋習夫何有司奉行不謹復取前代
妖異之人以實之曰某某府城隍之神某某縣城隍之神怪誕不
經一至於此豈不深可嘆哉其論甚正今從之清易木主為塑像
仍設公座筆硯海門大田
俱有行祠見洪續志稿

關聖廟

在府署西半里始建時無攷清雍正五年郡守趙資添

建後殿楊守匯繼修之八年郡守江承玠添建大門築圍牆塑

神像十一年張守若震添建兩廡乾隆六年馮守璽增修之自

是廟貌完備

秦志稿

咸豐辛酉燬於寇同治間郡守劉璈重建光

緒十四年郡守成邦幹修葺

光緒志稿

文昌祠

在縣北白雲山

洪志

明邑人秦宗伯鳴雷建清順治五年

郡守唐虞世重建

康熙府志

前有唐公書院尋廢乾隆二十九年移

建華嚴庵前後復爲颶風所圯嘉慶九年邑人宋明府世榮卽

舊址重新之

同治志稿引秦志宋世榮記白雲山曲紫邏城限路徑則蚓折蛇盤澗壑則麻皴斧劈學士巖居在

焉中爲文昌祠前明邑鼎元宗伯華峯秦公所創建也夫其依崖架閣累石成梯拱列星排梁飛虹跨憶前身香案之侍小謫塵凡就往年書室之基大興土木萬八千峯仙客衣披一品以言歸一十七世宰官緣結三生而共證置身富貴頂禮神明謝塵鞅於人

間割蓬萊於海上壽藤古木助其鬱蔥飛閣曲欄精其位置洵盛
舉也真偉觀哉泊乎屢易星霜洊摧風雨桓桓瓊臺笙沸猶聞白
鶴飛來年年壺嶠塵揚又報紅羊劫換雖經黃堂之修葺旋傾薛
荔之牆偶披玉室之詩篇略認芭蕉之洞平泉花木雜付樵肩矮
屋蓬蒿改依梵刹此先輩若何邵諸老所爲殷建造之圖而家君
及方嚴諸公益復厘興修之志也然而底材不易籌費維艱或消
吉而旋停或釀金而漸耗嘉慶乙丑歲茂才燧峯羅君惜因循之
久也遂慷慨而任之剔蘇扶碑刈藁闢徑拓華嚴之舊址與佛分
居課版築於巖丁必躬相度首營正殿面拓層樓前臨掛榜之山
後枕梯雲之嶂雙峯筆聳點趁朱衣百雉衙排披成紫帶雲窗月
牖俯舊跡約百數步而高呂閣朱祠準成規在十餘楹以內工勤
二載費近千金蓋同人咸樂爲輸而賤子實襄厥事焉嗟乎福增
祥集孰非陰隲中來子孝臣忠總向修羅上去仙階有自天榜無
私彼華峯名冠羣英位登八座夫非丹籍之夙標紫宮之上選哉
而乃一時之瓣香偶奉異代之傑構爭歆亦可見名蹟之共珍善
根之不一味矣是用勒姓名於貞石誌科第之初桃凡有一椽一
之燭並在大書特書之例從此秩丁牲肅領取三千條功德
因緣卽看雲甲蟬聯誰非五百年神仙眷屬确山駢體文

咸

豐辛酉燬於寇光緒十七年郡守陳瑀邑人教諭何鍾麟訓導

蔣振鏞籌款建復生員李元澄宋庸德等董其事

光緒志稿

案龍顧山之東爲白雲山其上山則學士巖居在焉明中葉秦華
峯宗伯退老處右偏有文昌祠亦宗伯所創建旁設文昌社俾各
家子弟讀書其中附祠山地二十餘畝年收租稅爲祀神歲修費
至清嘉慶間庠宿以毗連之華嚴菴舊址在東岡上較爲寬敞乃
移祠於此規模崇煥咸豐辛酉燬於寇山地半被居民佔種光緒
十七年重建邑紳蔣運球何奏簣等清復祠產捐貲贖回山地仍
交同社挨輪管理二十一年東首三官堂尼不守清規趙守亮熙
出示驅逐改其堂爲崇正山房并附堂山地六畝零則撥入文昌
社繇是西界龍顧山東至普賢寺南接錢王祠均成文昌社社產
矣糧戶凡三日文昌祠東曰白雲山曰華嚴菴每年二月初三誕
辰致祭一次禮儀悉照嘉慶時相國朱文正公
珪之請春秋二仲詔升中祀典例光緒志稿

祭文

伏以運煥文明將相宰人間之位化宣陰隲善淫彰天道

况乎蓬海名區本應三台之宿何獨梓潼片壤長揚七曲之靈惟
茲踞北固之岡高連斗極俯東湖之水潤助文瀾健筆凌雲秀擷
雙峯古塔清思浣月塵消一勺澄泉左瞻武肅樵夫功烈與忠貞
並著右望紫陽正學文章同節義齊輝攬大瀛州之勝蹟啓小鄒

魯之休風人傑地靈洵足聚精而揚紀大從民願庶堪景福而會
昌今逢二月之生辰羣企五雲於太甲本禴祠烝嘗之義俎豆馨
香分福祿壽喜之班冠裳踰躋於戲十七世前身歷證孝友莫昧
眞源萬八峯吐氣在斯光輝敢忘新入登科預卜共叨榜第之榮
祝嘏虔申敬仰神明之
鑒謹以魁星配尙饗

天后宮

在靖越門外

同治志稿

舊在城東五里宋延祐中徙神像於

城南垣外水仙樓後爲方國珍所燬元至正十三年江浙行省

左丞帖理帖穆爾卽故祠之墟建復并買民地以廣之

周伯琦記海之

神曰天妃肇於閩中顯於宋季始於其里拯旱溢弭疾疢禦寇盜
應禱如響旣聞於時褒封表異商於海者遐邇徇靈悉如其素皇
元奄有萬方歲發海漕遂爲海神而專其禍福得非功行超邁則
統攝益隆猶夫國家之待羣臣積勞立勳則進之尊官重任者耶
巨舶口移飄席雲揭一息千里繫神是賴盲風怒濤危在頃刻叩
首疾籲神光下燭劃時靜恬順達所擬靈異若茲不可殫紀是以
累錫口制口庸示尊崇迺有護國庇民廣濟福惠明著天妃之號
又詔並海州郡皆置祠廟每歲之秋天子頒匳鄉遣使偏祭其祝

文曰皇帝敬遣某官某致祭其嚴且重若是台之爲郡東距海百
餘里郡舊有廟在城東五里而近延祐中廟圯遂爲廢墟乃徙神
像於城南水仙之樓至十二年五月賊寇台州登水仙樓樓忽棟
撓登者多竿死賊遂縱火焚掠樓亦隨燬守者復奉神像旅寄天
寧寺几筵簡陋過者病之明年四月江南行臺侍御史資善公江
省行中書省左丞資善公受詔來台口口口口口口口口口口口口
業二公休沐之暇過天寧瞻禮神像愀然不安乃各捐餐錢若干
貫以倡郡人而屬監郡字顏忽都專經營之又躬即故廟墟地相
方度宜心計指授口口口口口口口口口口口口口口口口口口口
給廼堂廼構不月而成基廣口口口口口口口口口口口口口口口口
屋前覆縱三楹橫倍之迴廊僉門夷庭崇壇唐璧修飭齋庖具備
門之外隙地爽塏亭於其東口口口口口口口口口口口口口口口口
其間清流南帶修竹茂樹重陰複翠季秋始經孟冬訖工乃以吉
日迎置神像冠服尊嚴繪飾炳煥絡繹釋瞻仰具駭且欣伯琦奉旨
代祀適以是月至台郡人士咸以爲聖君虔祀典於上相臣建祠
宇於下相望數千里敬神之忱膺合豈非千載一時之盛歟迺以
十又一月戊辰同浙東僉憲篤滿帖穆爾副都元帥黑的兒率郡
之軍民官屬且祝致祭天氣澄朗薦裸如式祀禮既竣登胙於亭
均饗神賜旅酬雍衍上下懽洽遂合辭徵文刻石廟庭以示永久
按禮曰聖王之制祭祀也禦大菑捍大患則祀之又曰有天下者

祭百神祈報之道祀典所崇惟天爲大而海儼之惟海爲大而神
司之尊以天妃崇莫並焉其爲禦捍豈他神比綸音專使廟享海
城禮所宜然台之祠宮廢而復興茲州城弊於兵燹人心皇皇二公之
二公之心可謂忠且厚矣况茲州城弊於兵燹人心皇皇二公之
來德望所臨郡醜款伏屬當惡歲粒食頗艱小大嗷嗷乃發軍需
大振困窮盡蠲貢稅以蘇民力植弱起痿臺稚頌戴視人猶已視
官猶家郡之闕政無一不舉觀夫廟宮之建則餘可知矣遂作迎
享送神詩遺台人俾歌以侑祀於廟侍御公名左荅納實理字廷
獻跋歷中外前守溫州口口保城有功左丞公名帖理帖穆爾字
文彬往歲執政中書進賢能清銓選有善譽二公爲時重臣皆高
昌名族僉憲公字仲彬蒙古氏嘗爲南臺御史僉漢中憲振厲風
紀副師公口口傑西域人前臨海道千戶亦以禦捍溫州功陞監
郡公字元卿伯牙吾台氏名進士嘗監大邑知鄭州入爲國史院
經歷僉憲河南口口口口時督工者天寧寺沙門明攷郡士李德大
也其詩曰奕奕兮新宮鬱峨峨兮城之東睇搏桑兮五色杏龍駕
兮雲中潔八珍兮羞五齊敷華几兮疊洗瀉博山兮晨綰縕闔閭
闔兮自我天子曠浩森兮后之庭藁一隅兮赤城檐瞬息兮俛至
靈未來兮愁予情廣莫兮披披粉珠蓋兮拂虹霓左天吳兮右冰
夷凌蛟寶兮貝闕神之來兮衆心悅戛玉兮鑑鏞弦瑤瑟兮歌泯
泯舞應節兮合奏於皇樂胥兮百福崇焱迴幹兮羣靈翕從滄海

晏兮纖塵清罔象伏兮口澄明沕淵潛兮沛遐征混鴻化兮穀豐
登彰靈德兮相我太平劉基天妃宮記太極散爲萬彙惟天爲
最大故其神謂之帝地次於天其祇后也其次最大者莫如海而
水又爲陰類故海之神降於后曰妃而加以天尊之也天妃之名
古不見經傳國家建都於燕始轉粟江南過黑水越東萊之罙成
山秦始皇帝之所射魚妖蜃之市悉帖安如平地皆歸功天妃故
薄海州郡莫不有天妃廟歲遣使致祭祀禮極虔而颿舶之往來
咸寄命於神卽有變怪風惡濤疾呼神乞靈有若火見桅檣間其
光輝輝然舟立自定由是海邦之人莫不知尊天妃而天妃之神
在百神之上無或與京台州故有天妃祠在城東五里延祐中守
土臣病其遠弗便於祀事乃徙置其神像於城南垣外水仙之樓
故祠遂廢爲墟今至正十有一年方國珍復亂海上明年夏五月
寇台州自中津橋直至登樓騎屋山內薄臨復城城中人方拒擊樓
忽自壞登者盡壓死遂縱火焚郭外民舍樓并燬又明年中書參
知政事帖理帖穆爾出爲江浙行省左丞領征討事賊聞之因溫
州守帥吳世顯納款請降奏上有詔命左丞公與南臺侍御史左
答納實理同往察便宜以行招討二公既受命至台州遣使宣諭
方氏兄弟大感悟悔罪悉歸所俘民願歲帥其徒防餽糧至直沽
以自効於是海上旣寧惟天妃之神無所於棲遂召其父老謂之
曰嗚呼古先哲王所以致敬於神者非所以爲民乎夫神無依惟

人是依人盡其禮而後神降之福今此邦之民士貢禦衝鋒鏑蒙
荆棘披霜雨數歲惟近在濱之故海之神天妃爲靈今人既獲
定而神未有居無乃於祀典有闕而札瘥天厲之咎無所歸乎衆
拜曰然公命吾欲也乃卽故祠之墟買民地以廣之命達魯花赤
李顏忽都治其役及十月己酉廟成後帶平原前拖長江環以羣
山清宮迴廊丹碧照耀高門繚垣墁瓦輝赫修篁美木列植左右
台人觀之無不樂神之有依而惠福是邦也於是括蒼劉基旣叙
其事復作迎享送神之章俾歌以祀神其詞曰潔珍兮羞肥芳椒
蘭兮菲菲盼靈丹兮注雲旗神不來矣渺予思輕霞兮長烟風颺
颺兮水漪漣神之來兮翳九玄伐鼓兮鑑鐘吹羽笙兮舞霓幢焱
迴旋兮留六龍樂具奏兮齋雍雍鴻熙洽兮釐祝從江安流兮恬
波伏蛟龍兮偃黿鼉蔚桑麻兮穰麥禾有壽考兮無天瘥穆幽潛
兮動天和於神功兮
世不磨赤城後集

尋圯乾隆二年閩商公捐建復今地

知府蘇光

碑缺

嘉慶十八年重修

龔維琳記歲丙戌秋予以庶吉士告
假出都由台郡訪諸親舊寓天后宮

會館同鄉情意甚殷以是廟邇年重加修葺思欲再垂碑碣仰昭
神貺殷然以勒石之文諸口維吾聞之建廟於台也由來已遠康
熙初年東甄鎮憲張公就江下舊基而興之但去郡稍遠恐朝夕
焚祝未週於乾隆二年諸同鄉妥卜郡靖越門外遷廟址而鼎新

焉四至劃然正殿樓廊燦乎真舉沿江一帶復築石岸植楊柳以禦洪濤衝擊益神光赫濯而我同人一縷奉祀之意於是得伸也第創建已久廟宇漸頽吾鄉之貿易於台者漳霞較多因同各府公議鳩金於嘉慶十八年復增修整鳥革鞞飛迎紫氣而延薰風備哉燦爛真神明之式也夫有舉莫廢禮誌之矣答神庥崇典祀同鄉義舉其足嘉也修葺禮成由來殊不可沒再勒茲碑所以尊聖母顯鑠之靈仰副我朝奉祀之典者合在乎此而庇佑豈有窮歟

咸豐十一年燬於寇同治

十年郡守劉璈督閩商林益謙等重建

同治志稿

舊宮雖存惟訪碑

者偶至而祀事不及焉

按神姓林氏興化莆田都巡君之季女生而神異能力拯人患難室居未三十

而卒水旱癘疫舟航危急有禱輒應元大德三年以漕運效靈封護國庇民明著天妃延祐元年封護國庇民廣濟明著天妃天歷二年加封福惠清康熙二十三年詔封天后五十九年奉旨春秋致祭編人祀典雍正十二年詔府州縣一體建廟奉祀各官綵服將事二跪六叩首行三獻禮祭品帛一白瓷爵三羊一豕一酒尊一銅一簠簋各二籩豆各四

龍神廟 在崇和門外半里舊名德淵廟在縣東北五里法安院

側祀白龍潭宋崇甯五年邑令樓君明改壇建廟政和五年賜

德淵額建炎四年封滋榮侯時禦海赤頰碧羸及甯海之湫水

四潭同被侯封俗所謂五龍是也隆興二年郡守趙伯圭重建

嘉定十四年趙守彥摺復新之

赤城志

清嘉慶八年郡守特通阿

以後山地僻不能容牲帛擇東湖之樵雲樓址徙建焉

洪續志稿特

守自記云今上御極之六年冬特通阿奉命知台州府事次年夏
浙東苦旱自四月至六月不雨田龜坼苗如束藁農有憂色時凡
有守土之責者皆就所治爲壇以請特通阿謹率屬步禱於郡之
天寧寺六月初五日爲始越七日雨弗降赫日如赭天無片雲民
情滋懼十三日未時有自前所來者見有龍現海中雲氣扶之徐
徐上頭角鱗鬣宛然可觀海濱居人羣聚指視兒童或驚且譁龍
遂奮勢起風雷交作大雨如注郡所屬境同時霑徧鄰郡亦以次
得雨然較遲有歎入者惟台收穫不少減稱有秋焉念茲郡濱海
環山民俗凋劫每歲催科常絀額下流支港通大洋愚民或誘於
利不能無奸歲一不登諸事蜩起以特通阿之德薄才淺其將何